



SAVEZ OPĆINA I GRADOVA
FEDERACIJE BOSNE I HERCEGOVINE
Association of municipalities and cities of the FBiH

GODINA: XIII

BROJ: 230

DATUM: 04.11.2016.GODINE



Usluge Saveza

• PRAVNO SAVJETOVALIŠTE:

Selma Fišek, viši saradnik za pravna pitanja
fax: + 387 33 552 810
selma@sogfbih.ba

• FINANSIJSKO SAVJETOVALIŠTE:

Dženita Kovačević, viši saradnik za finansijska pitanja
fax: + 387 33 552 810
dzenita@sogfbih.ba

Sadržaj biltena:

Održano savjetovanje na temu
Uvođenje trezorskog poslovanja u
JLS

1

Nastavak razvoja procesa certifi-
ciranja općina

1

Održana izborna skupština
Udruženja poslodavaca komunalne
privrede u FBiH

2

Potpisan ugovor o finansiranju pro-
jekta iz oblasti energetske efikas-
nosti

3

U Neumu otvoren Međunarodni
susret vinogradara i vinara Sabat-
ina 2016

4

Helić: Prioritet je povoljan ambijent
za investicije i zapošljavanje

4

Konferencija 'Invest in Orašje':
Orašje kao investicijska destinacija

5

Tešanjski privrednici nastavljaju
saradnju sa Općinom Tešanj

6

Bilten Saveza općina i gradova Federacije Bosne i Hercegovine

ODRŽANO SAVJETOVANJE NA TEMU UVOĐENJA TREZORSKOG POSLOVANJA U JLS

U Sarajevu, 26.10.2016. godine Savez općina i gradova FBiH organizirao je Savjetovanje na temu „Uspostavljanje trezorskog poslovanja u jedinicama lokalne samouprave u Federaciji Bosne i Hercegovine”. Ovu aktivnost Savez je realizirao u saradnji sa USAID-ovim projektom reforme fiskalnog sektora (FAR projekat) kojeg implementira FINIT Consulting d.o.o. sa Federalnim ministarstvom financija/finansija. Učesnici Savjetovanja bili su pomoćnici načelnika za finansije/financije. Osim važnosti implementiranja Zakona o trezoru/riznici i uspostavi sistema trezorskog poslovanja u jedinicama lokalne samouprave u FBiH, prezentirane su i dobre prakse u ovoj oblasti, kao i pripreme za planiranje i izvršenje budžeta za 2017. godinu u novom okruženju. Takođe, kao novina, prezentirana je i web stranica Far Projekta, putem koje će se jedinice lokalne samouprave moći upoznati sa svim važnim aktima i aktivnostima potrebnim za uvođenje trezorskog poslovanja, kao i razmijeniti pitanja i otkloniti dileme na koje će, eventualno, naići u ovom procesu. U zavisnosti od potrebe, planirano je održavanje nekoliko radionica na ovu temu.



NASTAVAK RAZVOJA PROCESA CERTIFICIRANJA OPĆINA



Sekretar Bejić sudjelovao je na sastanku Regionalnog savjeta održanom 25-26. oktobra/listopada 2016.godine koji je okupio predstavnike zemalja članica BFC SEE mreže iz Crne Gore, Hrvatske, Bosne i Hercegovine, Makedonije, Srbije kao i predstavnike GIZ ORF Otvorenog fonda za modernizaciju općinskih usluga. Članovi Regionalnog savjeta su prethodno sudjelovali na

nacionalnoj konferenciji u Hajatu u organizaciji NALED-a, Ambasade Velike Britanije i USAID Projekta za bolje uvjete poslovanja na kojoj su predstavljeni rezultati najnovije Doing Business liste Svjetske banke. U svom uvodnom obraćanju predsjednik Regionalnog savjeta, Saša Drezgic, je komentirajući posljednje rezultate Doing Business-a istakao da je projekat BFC SEE u fokusu u regiji i da je primjetna podrška vlada država u kojima se certifikat provodi te razmotriti dostupnost sredstava iz dostupnih EU fondova. Ujedno, g. Kristof di Marko je ispred GIZ-a na današnjem sastanku najavio početak nove faze i u tom smislu istakao da je veoma bitno imati jasnu percepciju budućih aktivnosti i viziju razvoja mreže.

Gledajte Savez općina i gradova
Federacije Bosne i Hercegovine na



Nakon uvodnih obraćanja napravljena je i kratka retrospektiva u pogledu rezultata koji su uz podršku preko dvadeset institucija u regiji ostvareni u prethodnom periodu, a to je svakako broj od 27 certificiranih lokalnih samouprava kod kojih su prema rezultatima sprovedenog istraživanja (Mystery shopper) uvjeti za poslovanje 76% bolji nego u ostalim lokalnim samoupravama. Također, certificirane lokalne samouprave su za tri godine (2012-2015.) privukle blizu 1 milijarde eura direktnih stranih investicija, što je u prosjeku tri puta više od njihovih konkurenata koji nemaju certifikat. Sastanak Regionalnog savjeta bio je prilika da se napravi presjek i sagleda status u zemljama članicama, da se razgovara o novim projektima uz podršku GIZ-a, a ujedno i razmotre mogućnosti daljeg razvoja platforme koja je iznjedrila i brojne druge inicijative poput elektronskih građevinskih dozvola, sive ekonomije, katastra, vaučerizacije itd. Razgovarajući o tome, sudionici sastanka složili su se da je za održivost mreže neophodno razmišljati u pravcu uključivanja novih zemalja, nastavka suradnje s međunarodnim institucijama, ali i osiguranje institucionalne podrške na nacionalnoj razini od strane resornih ministarstava u okviru novog regionalnog sporazuma.

ODRŽANA IZBORNA SKUPŠTINA UDRUŽENJA POSLODAVACA KOMUNALNE PRIVREDE U FBiH

Na redovnoj izvještajnoj/izbornoj Skupštini Udruženja/ Udruge poslodavaca komunalne privrede u Federaciji BiH, održanoj 3. novembra/ studenog u Sarajevu, usvojena je Informacija o primjeni Okvirnog kolektivnog ugovora o pravima i obavezama poslodavaca i radnika u oblasti komunalne privrede za teritoriju FBiH, koji je potpisan krajem septembra. U uvodnom dijelu skupu se obratila Vesna Travljanin, direktorica Saveza



općina i gradova Federacije BiH, koja je istakla spremnost na saradnju ove dvije organizacije.

Kako je Feni kazao koordinator Udruženja poslodavaca komunalne privrede u FBiH Hazim Zečević, objavljivanjem Okvirnog kolektivnog ugovora u službenim novinama 7. oktobra prestala je primjena kolektivnog ugovora iz 2006. godine, koji je bio limitirajući za razvoj komunalne privrede i uopće poslovanje komunalnih preduzeća. Dodao je da se komunalna preduzeća u FBiH susreću se s ozbiljnim finansijskim poteškoćama, a što proistječe iz neodgovarajuće cijene usluga, te nemogućnosti efikasne naplate. Zečević navodi da nakon usvajanja novog kolektivnog ugovora slijedi usklađivanje pravilnika o radu i drugih internih akata komunalnih preduzeća s novim Zakonom o radu, odnosno Okvirnim kolektivnim ugovorom. Skupština Udruženja poslodavaca komunalne privrede u FBiH jednoglasno je usvojila Godišnji izvještaj o radu, te je predložen sastav organa Udruženja za naredni četverogodišnji mandat. Za predsjednika Skupštine ponovno je izabran Matija Lučić, direktor preduzeća „Vodovod i kanalizacija“ (VIK) iz Jajca, koji je i dosad obnašao tu funkciju, a za njegovog zamjenika izabran je Osman Čaušević iz VIK-a Velika Kladuša. Na poziciju predsjednika UO, također, je reizabran dosadašnji nositelj te funkcije Selim Babić, direktor KJKP „Rad“ iz Sarajeva, a za njegovog zamjenika Admir Bećirević, direktor JKP „Komunalac“ iz Tuzle. Sudionicima skupštinskog zasjedanja predstavljeni su projekti UNDP-a pod nazivom „Metodologija za određivanje cijene usluga vodosnabdijevanja i odvodnje (komunalnih usluga) u FBiH“, kao i „Uloga regulatornog tijela u postupku utvrđivanja cijena komunalnih usluga vodosnabdijevanja, odvodnje i prečišćavanja otpadnih voda“. Skupštinskom zasjedanju predhodila je sjednica Upravnog odbora (UO) Udruženja poslodavaca komunalne privrede u FBiH. Udruženje poslodavaca komunalne privrede osnovano je u oktobru 1999. godine s 32 članice (s oko 3.000 uposlenih), dok danas ima 72 članice s oko 8.000 uposlenih iz svih deset kantona Federacije BiH.

Prezentirana je web stranica Far Projekta, putem koje će se jedinice lokalne samouprave moći upoznati sa svim važnim aktima i aktivnostima potrebnim za uvođenje trezorskog poslovanja, kao i razmijeniti pitanja i otkloniti dileme na koje će, eventualno, naići u ovom procesu.



POTPISAN UGOVOR O FINANSIRANJU PROJEKATA IZ OBLASTI ENERGETSKE
EFIKASNOSTI

Ugovor o sufinansiranju programa i projekata iz oblasti energetske efikasnosti za 2017. godinu, u sklopu programa „Zeleni ekonomski razvoj 2014-2018.“, između Razvojnog programa Ujedinjenih nacija (UNDP) u BiH i Fonda za zaštitu okoliša Federacije BiH potpisan je 1. novembra/ studenog u Sarajevu. Potpisali su ga rezidentna koordinatorica Ujedinjenih nacija i rezidentna predstavnik Razvojnog programa UN-a (UNDP) u BiH Sezin Sinanoglu i direktor Fonda za zaštitu okoliša Federacije BiH Fuad Čibukčić.

Ugovor se odnosi na nastavak aktivnosti u četvrtoj godini petogodišnjeg Programa "GED -Green Economic Development - Jačanje kapaciteta i smanjenje troškova energije u javnom sektoru FBiH kroz povećanje energetske efikasnosti, upravljanje energijom i smanjenje emisija u zrak". Ukupna dosadašnja vrijednost ugovora iznosi 5.811.877 KM, a produžetak ugovora za 2017. potpisan je na iznos od 1.070.750 KM. Direktor Fonda za zaštitu okoliša FBiH Fuad Čibukčić je kazao novinarima da su danas potpisali novi dio ugovora 2014.-2018., koji se odnosi na energetske efikasnost, ističući da je to vrlo važan segment u njihovom djelovanju. Naveo je da se jedno od dva poglavlja koja se odnose na pristupanje BiH Evropskoj uniji odnosi na okoliš, a jedno na energetske efikasnost. "Ta dva poglavlja sveukupno čine čak 30 posto tkiva koje BiH treba da ispregovara s EU tokom pristupanja Uniji. To nas obavezuje da već sada poduzimamo određene mjere koje će doprinijeti što boljem ispunjavanju tih naših obaveza na putu BiH ka EU", istaknuo je Čibukčić. Naveo je da su uspjeli prvi u regionu da implementiraju revolving fond, „što je veoma značajan korak“. Rezidentna koordinatorica Ujedinjenih nacija i rezidentna predstavnik UNDP-a u BiH Sezin Sinanoglu je kazala da od 2014. godine, u saradnji sa Švedskom vladom, Razvojni program UN-a provodi projekat Zelenog ekonomskog razvoja u cilju promicanja i unapređenja u oblasti energetske učinkovitosti. Po njenim riječima, program ukupno vrijedi oko 12 miliona eura, provodi se na teritoriji cijele BiH, a aktivnosti uključuju unapređenje objekata, unapređenje ljudskih kapaciteta i kapaciteta samih institucija da upravljaju aktivnostima energetske efikasnosti. U tom procesu sarađujemo i s Federacijom BiH, koja je do sada bila naš odličan partner, konkretnije Fond za zaštitu okoliša Federacije BiH - kazala je Sinanoglu, dodajući da su i oni izdvojili značajna sredstva koja su dali upravo za sufinansiranje. Danas su, kaže, potpisali sporazum o sufinansiranju kojim se ove aktivnosti nastavljaju. Sinanoglu je naglasila da je više efekata koji će se postići u okviru ove saradnje, a jedan od efekata je smanjenje emisija CO2. Navela je da investicije u energetske efikasnost ili bilo koje investicije u zaštitu okoliša sa sobom neminovno donose i takozvana „zeleni radna mjesta“. "Do sada, u kontekstu implementacije projekta „Zelenog razvoja“, imali smo nekih 600 radnih mjesta koja su otvorena. To je nešto što ne možemo zanemariti u jednoj zemlji gdje imate tako visoku stopu nezaposlenosti, pogotovo stopu nezaposlenosti mladih", istaknula je Sinanoglu. Po njenim riječima, bilo koja ulaganja u energetske efikasnost i okoliš mogu osigurati identičan broj radnih mjesta kao što to imamo, na primjer, u građevinskom sektoru. "Kada bi se u potpunosti proveo nacionalni plan za energetske efikasnost mogli bi imati do nekih 4.000 radnih mjesta na godišnjoj razini", kazala je Sinanoglu. Potcrtala je da su treći, i možda najvažniji efekat ovih mjera značajne, vrlo konkretne finansijske uštede koje se ostvaruju. Dodala je da su tokom provedbe projekta ulagali i provodili mjere na javnim objektima, bolnicama, obdaništima, općinama. "Sve te mjere su dovele do značajnih ušteda i ono što je još važnije, sve te ostvarene uštede su se ponovo mogle iskoristiti za potrebe humanog razvoja", kazala je Sinanoglu.

KORISNI LINKOVI ZA
PREDPRISTUPNE FONDVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmamed.eu
www.tacso.org
www.euroinfocentar.ba
www.balkanfund.org
www.eurelsmmed.com
www.eacea.ec.europa.eu





U NEUMU OTVOREN MEĐUNARODNI SUSRET VINOGRADARA I VINARA SABATINA 2016

Međunarodni susret vinogradara i vinara Sabatina 2016 otvoren je 4. novembra/studenog u Grand hotelu Neum u Neumu. Manifestacija se održava pod visokim pokroviteljstvom člana Predsjedništva Bosne i Hercegovine Dragana Čovića, te pod visokim supokroviteljstvom predsjednice Republike Hrvatske Kolinde Grabar-Kitarović, a u ime člana Predsjedništva BiH Dragana Čovića, otvorio ju je ministar pravde BiH Josip Grubeša.



Otvaranju je prisustvovao premijer Hercegovačko-neretvanskog kantona Nevenko Herceg, zajedno sa članovima Vlade tog kantona, predsjednik Privredne komore Federacije BiH Marko Šantić, načelnik Općine Neum Živko Matuško, te brojni vinogradari iz Hrvatske i Bosne i Hercegovine, te drugih zemalja regiona. Sabatina, koja se prvi put održava u BiH, godišnje okuplja vinogradare, vinare, stručnjake, someliere, proizvođače i distributere vinogradarsko-vinarske opreme, ugostitelje, trgovce, predstavnike resornih ministarstava, medije i druge sudionike vezane uz vinogradarstvo i vinarstvo iz bh. vinskih regija i inozemstva. U sklopu manifestacije bit će održan Sabor vinogradara i vinara na kojem će biti analizirana berba grožđa 2016. te razmatrano aktualno stanje vinogradarstva i vinarstva. Cilj je Sabatine edukacija i povezivanje vinogradara i vinara međusobno, sa strukom, te s ostalim gospodarskim subjektima izravno vezanim za vinogradarstvo i vinarstvo. Na sajmu vinogradarstva i vinarstva, te berzi i izložbi vina svoje proizvode predstavlja oko 300 izlagača iz BiH, Hrvatske i drugih zemalja. Kao plod dugogodišnje poslovne suradnje, kontakata i iskazane želje inozemnih vinogradara i vinara, Sabatina se prvi put održava na teritoriju dviju država - Hrvatske i Bosne i Hercegovine. Također, osim međunarodne konferencije i radionica o vinogradsko-vinarskoj struci, bit će promovirano i nekoliko knjiga među kojima i "Marketing vina" te "Atlas vinogradarstva i vinarstva Bosne i Hercegovine". Organizatori manifestacije su Zadružni savez Dalmacije i Hrvatska udruga vinarских gradova iz Hrvatske, a suorganizatori Federalni agromediteranski zavod Mostar i Grand hotel Neum iz Bosne i Hercegovine. Nakon ceremonije otvaranja uručena su priznanja zaslužnima za organizaciju manifestacije, vinogradarima za postignute rezultate te drugima koji su podržali organizaciju Sabatine 2016.



Grb Općine Neum

HELIĆ: PRIORITET JE POVOLJAN AMBIJENT ZA INVESTICIJE I ZAPOSŁJAVANJE



Načelnik Općine Gračanica Nusret Helić potvrdio je peti mandat na proteklom lokalnim izborima s ukupno osvojena 10.354 glasa odnosno 42,30 posto. Ova općina na području Tuzlanskog kantona poznata je po poduzetništvu i razvoju mnogobrojnih uspješnih malih i srednjih preduzeća, zbog čega je nazvana "od posla čaršijom". Kako je u izjavi za Fenu potvrdio načelnik Općine Gračanica Nusret Helić, na području ove općine egzistira 1.110 privrednih subjekata, od čega 460 malih i srednjih preduzeća i 650 samostalnih zanatskih i drugih radnji. Stvaranje povoljnog poslovnog ambijenta za

nove investicije i zapošljavanje bit će, poručuje, prioritet rada i u novom mandatu.



Grb Općine Gračanica

Po njegovim riječima, stvoreni su preduvjeti za plansku izgradnju nove industrijske zone s kvalitetnom infrastrukturom u blizini puta prema općini Petrovo, te nastavak postojeće industrijske zone. Trenutno se grade tri nova pogona u spomenutoj industrijskoj zoni, a Helić ističe da se očekuje još šest novih s oko 40.000 metara kvadratnih poslovnog prostora. Općinski načelnik podvlači da se u ovoj općini građevinska dozvola maksimalno čeka tri dana, a bit će omogućene rente i naknade na odgođeno plaćanje. Naglašava da će Općina Gračanica u svrhu pomoći privredi u narednom periodu finansirati prekvalifikaciju postojećih kadrova, koji su na evidenciji Zavoda za zapošljavanje, prema potrebama privrede ove općine. Helić ocjenjuje da se na području ove općine u privredi trenutno može zaposliti novih 500 ljudi, ali da nema stručno osposobljenih za tražene pozicije, a smatra da će državi BiH uskoro faliti stručnog kadra kada su u pitanju zanati. Kako Helić najavljuje, planirano je i otvaranje fabrike za prečišćavanje otpadnih voda za šta se traže sredstva iz fondova i donatori, a vodosnabdijevanje je također jedan od prioriteta u radu općinskog načelnika i u novom mandatu. Najavljuje i zatvaranje postojeće deponije smeća, dodavši da je Gračanica ušla u projekt regionalne deponije s 13 drugih općina. "Naredne godine planiran je završetak sportske sale za srednjoškolce i druge namjene, iako je to u nadležnost kantona. Općina je za ovaj projekt uložila tri i po miliona KM, a kanton samo 300.000 KM", naglašava Helić. Očekuje se i završetak regulacije korita Sokoluše, a planirano je i uređenje saobraćaja u gradu kroz dva nova kružna toka i izgradnja novog mosta, te unapređenje putne i kanalizacione mreže.

KORISNI LINKOVI ZA PREDPRISTUPNE FONDVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc-bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

KONFERENCIJA „INVEST IN ORAŠJE“: ORAŠJE KAO INVESTICIJSKA DESTINACIJA

"Invest in Orašje" naziv je privredne konferencije koja je održana 21. oktobra/ listopada 2016. godine u hotelu „Navis“ u Orašju, u organizaciji Općine Orašje. Na konferenciji je sudjelovalo oko 70 predstavnika poslovne zajednice, federalnih, županijskih i općinskih institucija, nevladinog sektora, te kao gosti predstavnici Ambasade Republike Hrvatske, gradova Pleternica (RH) i Srijemska Mitrovica (RS) i općina Žepče, Odžak i Domaljevac-Šamac. Cilj konferencije bio je



predstaviti općinu Orašje kao potencijalnu investicijsku destinaciju s posebnim fokusom na ulogu i značaj poduzetničkih potpornih institucija u kreiranju povoljnog poslovnog okruženja i razvoju malog i srednjeg poduzetništva. Konferenciju je otvorio Općinski načelnik Đuro Topić, koji je predstavljajući općinu Orašje kao investicijsku destinaciju naglasio značaj „Poduzetničke zone Dusine Orašje“ kojom su stvoreni svi preduvjeti za nove investicije i ulaganja u ovo područje. Direktor Centra za poduzetništvo Orašje, a ujedno i Voditelj Projekta „MOSLED“ Mato Mikić, predstavljajući Projekt govorio je, uz ostalo, o prednostima ulaganja na području općine Orašje, od izvrsnog geostrateškog položaja, niskih troškova poslovanja, povoljne cijene građevinskog zemljišta, suvremene poslovne infrastrukture, atraktivnog paketa poticanja za ulaganja, do dostupne, kvalificirane i konkurentne radne snage. O investicijskim mogućnostima u BiH prezentaciju je imala Blaženka Mišković, zamjenica direktora Državne agencije za promociju stranih ulaganja. Treća prezentacija na konferenciji odnosila se na poduzetničku infrastrukturu o kojoj je govorio Jozo Bejić, tajnik federalnog ministra razvoja, poduzetništva i obrta. Istaknuo je općinu Orašje kao pozitivan primjer u razvoju infrastrukture, naglasivši kako je „PZ Dusine“ Orašje jedna od najbolje uređenih u F BiH. Konferencija „INVEST IN ORAŠJE“, nakon trosatnog rada, završila je panel diskusijama kojima je moderirao Zdravko Miović, direktor Razvojne agencije EDA Banja Luka. Održana konferencija dio je aktivnosti koje se provode u okviru Projekta „Održivi lokalno ekonomski razvoj općine Orašje“ („Municipality of Orašje Sustainable Local Economic Development“ – MOSLED) koji financira EU, kroz Program IPA 2011 u okviru podrške lokalnom ekonomskom razvoju u BiH. Ukupna vrijednost Projekta je 461.265,93 EUR, od čega EU financira 391.885,93 EUR, a Općina Orašje i partneri Poduzetnički centar Pleternica i Udruga privatnih poduzetnika Orašje sufinanciraju projekt sa 69.380,00 EUR.



Grb Općine Orašje



Musala 5/1

71000 Sarajevo

Telefon: ++387 33 216 502, 209 024, 209 120

Fax: ++387 33 552 810, 216 502

E-mail: dino@sogfbih.ba

Pratite nas na:

Gledajte Savez općina i gradova Federacije Bosne i Hercegovine na

YouTube

Pratite Savez općina i gradova FBiH na



facebook
Savez općina i gradova Federacije Bosne i Hercegovine

Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način Vam, također pružamo informacije o održanim konferencijama, seminarima, radionicama, okruglim stolovima, javnim raspravama, o održanim sjednicama organa i tijela Saveza.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba

Molimo vas da informacije o našem biltenu prosljedite svim u vašoj i susjednim općinama i drugim zainteresiranim.

Ukoliko želite da objavite neke od vaših novosti, iskoristite bilten Saveza, koji je brz i efikasan način komuniciranja.

Sa zadovoljstvom očekujemo vaše komentare, sugestije i primjedbe.

TEŠANJSKI PRIVREDNICI NASTAVLJAJU SARADNJU SA OPĆINOM TEŠANJ



Načelnik Općine Tešanj Suad Huskić je 30. oktobra/ listopada upriličio prijem za menadžere lokalnih kompanija koje su po rezultatima Poslovnih novina uvrštene u 100 najboljih u Bosni i Hercegovini. "Iskreno nas raduje svaki uspjeh naših poslovnih subjekata, jer u tome vidimo i uspjeh lokalne zajednice. Danas smo skupa kako bismo čestitali i zahvalili najuspješnijim. Očito je da su kapital, znanje i poduzetnost ljudi s prostora općine Tešanj našli put do uspjeha", kazao je Huskić. U kategoriji velikih kompanija među 100 najuspješnijih našlo se čak sedam kompanija iz Tešnja: HIFA-Oil, MADl, Prevent FAD, MANN+HUMMEL BA, Napredak, Pobjeda i AS. Među najvećih 100 izvoznika iz BiH su MANN+HUMMEL BA, HIFA-Oil i Pobjeda, dok su prema ulaganjima u nove investicije najviše rangirani Prevent FAD Jelah, MANN+HUMMEL BA, Napredak, HIFA-Oil i MADl sa 3.887.619 KM. U kategoriji srednjih kompanija među 100 najuspješnijih u BiH po različitoj osnovi našle su se kompanije Enker, Europa Trade, Medena-Comerc i INOX Ajanović, dok su u kategoriji malih firmi među 100 najuspješnijih Euro Kantić, Hrast i Mark, saopćeno je. "Iskoristio sam priliku da potvrdim punu opredijeljenost da nastavimo uspješnu saradnju javnog i privatnog sektora kroz dijalog i partnerstva", istakao je načelnik Huskić. Dodao je da se pojedinačni uspjesi kompanija ogledaju kroz stalni rast broj zaposlenih, te da posebno raduje širok spektar razvoja različitih sektora poslovanja kao što su trgovina, metalna, drvna, te prehrambena industrija, itd.



Grb Općine Tešanj